



10. April 2024

UPA2024/33

Nunalerinermik inuussutissarsiuteqarnermik siuarsaaneq pillugu Inatsisartut inatsisaat
(Nunalerinermut, Imminut Pilersornermut, Nukissiutinut Avatangiisinullu Naalakkersuisoq)

Siumumiit qutsavigiumavagut Naalakkersuisut saqqummiussaannut.

Siullermik oqaatigilara, Siumumit Pilersikkumagatsigit inuiaqatigiit ataqatigiissut, ilatsiinnartuunngitsut, eqeersimaartut napassinnaalluartullu, inuiaqatigiittut akisussaaqataanertik qamuuna misigisimalluarlugu ilumoorfigalugulu innuttaaqataasut.

Inuiaqatigiit nunamik tunniussinnaasai akisussaassuseqartumik atorluarlugit avataaniillu pisariaqartitatik iluaqutigalugit imminnut napatittut.

Siunnersuutit qulequtaa siunertaalu Siumumit ilalerluinnarlugulu taperserparput, oqallitarnerni siuliini aamma tamanna ersarissumik oqariartuutigaarput.

Siunnersuut Naalakkersuisut Nunalerinermut Periusissiassatut 2021-2030-mut takorluugaat Siumumiit nuannaarutigalugu tigussaasumik nammineq pilersorneq pillugu inatsisitigut timitalerniarneqarmat.

Kalaallit Nunatsinni nunalerinerup uumasuuteqarnerullu immitsinnut pilersornitsinni pingaaruteqarluinnartutut inissisimalernissaat Siumup sulissutigissavaa. Taamaattumik siunnersuutigineqartoq tamakkiisumik tapersersoripput oqaatigissavara.

Imminut pilersornissamut siunniunneqartut – soorlu siunnersuummi oqaatigineqartoq illup iluani ikiorsorsorluni naatitanik naatitsisarfinnik minnerusunik ("indoor farming") aallarnisaasoqartoq takuneqarsinnaavoq. Tamakkualu annertusiartortinneqarnissaat pingaaruteqarluni.

Kalaallit Nunaanni annikitsumik ingerlanneqarpoq annertusiartortinneqartariaqarpoq, tungaanullu ingerlavugut, siunissami Kalaallit Nunaanni naatitanik imminut pilersorneranik annertusititsiniarnermi tunisassiorneq pingaaruteqarnerusutut inissisimalersinnaammata. Aammattaaq eqqaaneqartut immami qeqqussanik naatitsisarneq paaasernerlu pineqarlutik, imminut pilersornissamut periarfissat annertuut ilagivaat. Kingunerisussaavaa Nunatta kujataani suliffissat suli maannamit amerlanerusut pilersinneqarsinnaammata, tamannalu Siumumiit tapersersorluinnarparput.

Inatsisitigut piujuartinneqarnissaanut qulakkeerinnittariaqarpugut. Annertusaanissamut takorluukkat inatsisitigut periarfisaalerpata qularnangitsumik alliertortoqalerneranik malitseqarumaartoq, allarrpassuit ilanngullugit ineriartortinneqalernissaat kingunerisussaallugu.



Taamaammat Siumumiit tamatumani ineriartortitsineq pilersaaruserluakkamik Savaatillit Peqatigiit Suleqatigiissut (SPS) suleqatigalugit ingerlanneqassasoq avaqqukkuminaappoq. Aamma inuussutissalerinermut ilinniarfik INUILI atorluarneqarnissaanut kaammattuutigissavarput.

Inuussutissarsiutigalu ineriartortitsissagutta pingaaruteqarpoq taqqavani attaveqaasersuineq ilanngullugu ineriartortinneqassasoq, aqquusernit angallassissutillu, attaveqaatillu allat ilanngullugit ineriartortinneqassasut.

Naggataatigut oqaatiginngitsoorusunngilarput nammineq pilersorneq siammasilluinnartuummat, nangillugu pisuussutitta uumassusillit inuussutitut nunatta iluani atorluaanissatsinnut, kiisalu piniakkanik killilersukkanut nammineq sumiiffippassuarnik pilersortuunerput eqqaanngitsoorsinnaanngilarput. Ilanggullugit pilersaaruteqarfigilernissaat piffissaasoraarput pingaartumik inuussutissat avataaniit tikisiortukkagut akit tungaatigut qaffakkiartuinnartut taamaalilluta nammineqnpisuussutigut atorlugit iluaqutigilluarlugit pilersorluarsinnaagatta. Tamannalu ilanngullugu inatsisiliorneqarnissaa pingaaruteqassalluni.

Suliaq Inuussutissanut Aatsitassanullu ataatsimiititaliami eqqartorluarneqassasoq kissaatigaara.

Lars Poulsen, Siumut